



Setjhaba se ratehang sa CUT

Ke ntshetsapele molaetsa wa ka wa la 19 Hlakubele 2020. Le eleletswe hore Moporesidente Cyril Ramaphosa o phatlaladitse matsatsi a 21 a kginno ya ditshebeletso ka morero wa ho fokotsa ho nama ha *corona* (COVIDI-19).

Ke hula mantswe ao ke a buileng molaetseng wa ka o fetileng a reng “ditsha tsohle tsa thuto e phahameng di tla bulwa ka mora mafelo a beke ya Paseka ka la 15 Mmesa 2020”. Re ikamahantse le qeto ya Mokgatlo wa Diyunivesithi tsohle tsa Setjhaba tsa Aforika Borwa (USAf) ya hore re sebedise letsatsi la Mantaha wa la 20 Mmesa 2020 ho itlhophisa, yunivesithi e tla bulwa mme dithuto di tla qala ka lona letsatsi leo. Baithuti ba tla dumellwa ho kgutlela dihosetele ka la 18 Mmesa 2020. E bang ho ba le dipheho mabapi le taba ena, re tla le tsebisa hanghang. Baithuti ba tla fumana dithuto tsa bona diphaposeng kapa ka marangrang a thekenoloji ho latela maemo a ditaba.

Batsamaisi ba hlwaile mafapha a latelang: Dipuisanano tsa Thekenoloji (ICT), Dipuisano le Dipapatso, Ditjhelete, Ditefo, Setsi sa Diphuputso tsa Bophelo le Bongaka, Ditshebeletso tsa Tlhwekiso le Ditshebeletso tsa Tshireletso e le ditshebeletso tse hlokolosi tse tla hlokehang yunivesithing nakong ena ya kginno ya ditshebeletso. Basebetsi ba amehang ba filwe Phemiti ya Ditshebeletso tse Hlokolosi ho latela Molawana wa 11B(3) le disebediswa tsa boitshirelletso kgahlano le sewa sa *corona*.

Ho feta moo, re ile ra hira dikhampane tse leshome (10) tsa lehae ho hlwekisa meaho ya dikhempase tsa rona (Bloemfontein le Welkom) ho nnetefatsa hore basebetsi le baithuti ba rona ba fumana meaho e se na dikokwanahloko ka sepheo sa ho fokotsa palo ya ditshwaetso tsa *corona*.

Nakong ena ya matsatsi a 21 a kginno ya ditshebeletso, re tlilo kenya tshebetsong metjha e latelang:

- ❖ Dithuto tsohle tse neng di tlo fumanwa ka marangrang a thekenoloji di tla kginwa ho tloha ka la 27 Hlakubele 2020 ho fihla ka la 17 Mmesa 2020.
- ❖ Ho latela dipehelo tsa kginno ya ditshebeletso, basebetsi le baithuti ba ke ke ba dumellwa ho kena mabaleng a dikhempase. Ke basebetsi ba nang le Diphemiti tsa Ditshebeletso tse Hlokolosi tse tekennweng ke Motlatsamotjhanselara feela ba tla dumellwa ho kena mabaleng a CUT. Basebetsi bana ba lokela hore ba dule ba tshwere diphemiti tsa bona le dibukana tsa boitsebiso ka dinako tsohle.
- ❖ Lefapha la Basebetsi (HR) le tla hlophisetsa basebetsi bohle matsatsi a lifi e ikgethileng nakong ena ya kginno ya ditshebeletso. Nakong ena, basebetsi ba lokela ho itokisetsa ho thakgola ditshebeletso tsa rona ka marangrang a thekenoloji.
- ❖ Re lepa hore kginno ya ditshebeletso e tla ama matsatsi a phomolo a kgwedi ya Phupu mme lenaneo la dithuto le tla atoloswa ho fihla kgwedding ya Tshitwe 2020. Ka hoo, basebetsi le baithuti ba tla tshwanela ho etsa dithlophiso tse ntjha malebana le matsatsi a lifi le a phomolo

ho sa kganya. Rejisetara o tla fa baithuti lesedi le batsi ha nako e ntse e tsamaya. Re tla kena ditherisanong le mekgatlo ya basebetsi ho shebisana ka dithlophiso tsena le merero e amanang le tsona.

Setjhaba sa CUT se thoholetsa dikgato tsa mmuso ho fokotsa sekgahla sa tshwaetsano. Re itelletse ho ema ka maoto, re iketse ngatana e le nngwe ho fokotsa palo ya ditshwaetso tsa COVID-19. Jwalo ka diyunivesithi tse ding, CUT e sebedisana le mebuso ya masepala, ya porovense le ya naha mmoho le mekgatlo ya setjhaba ho fumana metjha ya sebele ho lwantsha sewa sena. Ka hona, ditsi tsa rona tse kang CRPM, PDTs le CQHL di lebane le merero e amanang le COVID.

Ka ha maemo a COVID a dula a fetofetoha, re tla nne re le behe sehlohlolong ka dinako tsohle. Re ntse re tswelapele ho ntlafatsa Leano la Ntshetsopele ya Kgwebo la yunivesithi le tla re thusa ho loha maano a ho fokotsa kapa ho fedisa dikotsi tsa ho se phethele selemo sa dithuto sa 2020. Ka hona, CUT e ikamahanya le maikemisetso a DHET le USAf ho phethela selemo sa dithuto sa 2020.

Re kgothalletsa basebetsi le baithuti ho se kopane le batho esita le ho latela metjha e meng ya ho itshirelletsa hore re tle re fokotse ho nama ha *corona*. Ho feta moo, re kopa o etele: <https://www.cut.ac.za/coronavirus> ho fumana lesedi le batsi ka *corona*. Ntilha e nngwe, re kopa hore o bale Molawana o Fetotsweng o phatlaladitsweng ho latela Dipehelo tsa Karolo ya 27(2) e leng **Sehlomathiso sa A**.

Re a ananela hore kgino ya ditshebeletso e ka baka kगतello ya maikutlo le pherekano. Le ha ho le jwalo, re na le tshepo hore metjha yohle e kentsweng tshebetsong e tla thusa ho fokotsa kotsi ya COVID-19. Hobane boitekanelo ba basebetsi le ba baithuti ba rona bo bohlokwa ho rona, re rata ho o hopotsa ka ditshebeletso tsa CareWays (ba letsetse nomorong ena ya mahala 0800 0004 007).

E se e ka Ramasedi a ka le hlohonolofatsa!

Prof. Henk de Jager

Vice-Chancellor and Principal